

Script of Evening Gojri News Bulletin 16 October 2024 at 1700 Hrs

ایوننگ گو جری نیوز بلیٹن مورخہ 16 اکتوبر 2024

یوہ آکا شوانی جموں بے عبید الرحمن تے محمد مبارک ماہرتیں خبر سنو۔ پہلاں خاص
خاص خبر۔

- *1. نیشنل کانفرنس خالیڈر عمر عبدالله نے اج جموں کشمیر یوٹی غا وزیر اعلیٰ غا عہدہ
غو حلف لیو بے۔
- *2. وزیر اعظم نریندر مو دی نے کہیو کہ مرکز جموں کشمیر غی ترقی خاطر عمر عبدالله
نال مل غے کم کریں گا۔
- *3. عمر عبدالله غی وزیر اعلیٰ غے طور حلف برداری تیں بعد کانگریس لیڈر ملک
ارجن کھرگے نے کہیو بے کہ کانگریس جموں کشمیر غی ریاستی درجہ غی بحالی
ناہہ یقینی بناوے گی۔
- *4. تے خارجہ امور غا وزیر ڈاکٹر ایس جے شنکر نے کہیو بے کہ ملکاں غی
سانجھی کو ششان نال ہی ذرائع غو صحیح استعمال ہو سکے۔

خبران غی تفصیل نال پہلاں عبید الرحمن ۔

Swearing In JK

نیشنل کانفرنس گا رہنما عمر عبدالله نے مرکزی غا زیر انتظام علاقہ جموں کشمیر غا
وزیر اعلیٰ غی حثیت سنگ رازداری حلف چایو بے۔ لیفٹنٹ گورنر منوج سنہا نے اج
سرینگر غا شیر کشمیر بین القوامی اجلاس مرکز مانہہ وزیر اعلیٰ عمر عبدالله تے ان غی
کونسل غا وزیران ناہہ رازداری حلف دوايو بے۔ حلف لین آلان مانہہ نیشنل کانفرنس غا
معروف رہنما سریندر چودھری نے بطور نائب وزیر اعلیٰ، سکینہ اتو، جا وید رانا، جا وید
ڈار تے آزاد امید وار ستیش شرما نے بطور وزیر حلف چایو بے۔ حلف برداری غی تقریب
مانہہ لوک سبھا غا رہنما راہل گاندھی، کانگریس صدر ملک ارجن کھرگے، سماج وادی
پارٹی گا صدر اکھیش یا دو تے جموں کشمیر غی سابق وزیر اعلیٰ محبوبہ مفتی غے نال
انڈیا بلاک غا دوجا رہنماواں نے وی حصو لیو۔

PM Omar

وزیر اعظم نریندر مو دی نے عمر عبدالله ناہہ جموں کشمیر غا وزیر اعلیٰ غا طور ور
حلف چاہن ور مبارکباد دتی ہے۔ اج اک سوشل میڈیا پوسٹ مانہہ وزیر اعظم نے عمر عبدالله
ناہہ لوکاں غی خدمت کرن غا سلسلہ مانہہ ان غی کو ششان با رے نیک خواہشات غو اظہا
ر کیو۔ ان نے کہیو جے مرکزی سرکار عمر عبدالله غی سرکار غے نال رل غے کشمیر غی
ترقی با رے کم کرے گی۔

Congress Statehood

کانگریس جماعت غا صدر ملک ارجن کھرگے نے اج عمر عبدالله غی جموں کشمیر غا وزیر
اعلیٰ گا طور ور رازداری حلف برداری تقریب تیں بعد جموں کشمیر غا ریاستی درجہ غی
بحالی گا سلسلہ مانہہ اپنی جماعت غا عزم با رے موقف ناہہ اُجاگر کیو۔ اس سلسلہ مانہہ

اے این آئی سنگ گل کرتاں واں کانگریس جماعت غا سربراہ نے کہیو کہ ہوں ات انہاں ناہہ مہا رکبا دین آیو ہاں۔ ہمنان خوشی ہے کہ مہاری اتحادی جماعت غو رہنما وزیر اعلیٰ بنیو تے ات اک لما چرتیں بعد جمہوری نظام بحال ہووے۔ تے ہم جموں کشمیر مانہہ ریا ست غا درجہ غی بحالی ناہہ یقینی بناواں غا۔ اس تیں علاوہ اے این آئی سنگ گل کرتاں واں کانگریس رہنما غلام احمد میر نے وزیر اعظم ور زور دیتاں واں کہیو کہ وے لوکاں غا منشور غو فوری جواب دیں تے نال ہی جموں کشمیر غا ریا ستی حثیت ناہہ وی بحال کریں۔ اُن نے کہیو کہ لوکاں نے ریا ستی درجہ غی بحالی خاطر اپنو منشور دتو ہے۔ تے یوہ مہارو پہلو مدعو تھو۔ اُن نے کہیو کہ وزیر اعظم نے حلقہ بندیاں تیں بعد چناؤ تے پھر ریا ستی ن درجہ غی بحالی بارے وعدو وی کیو تھو۔ کابینہ غا بنن بارے اُن نے کہیو جے اُس غی تشکیل غو یوہ تیجو مرحلو ہے۔ ہم چاں غا کہ وزیر اعظم تاواں لوکاں غا منشور غو جواب دیں۔ اُن نے کہیو جے ہم کہنو چاواں کے ہمنان ریا ستو دیو ہم کابینہ چلاواں گا۔

Farooq Govt

نیشنل کانفرنس غا صدر ڈاکٹر فاروق عبداللہ نے کہیو ہے کہ جموں کشمیر مانہہ نوی سرکار دوہاں خطاں غی عوامی مشکلات ناہہ ختم کرے گی۔ ذرائع ابلاغ نال گل کرتاں واں پارٹی صدر نے کہیو کہ سرکار دوہاں خطاں نال انصاف کرے گی اور عوام ناہہ راحت دے گی۔

Mahbooba Govt

پی ڈی پی صدر محبوبہ مفتی نے کہیو ہے کہ 5 اگست 2019 غے تہاڑے جموں کشمیر تیں دفعہ 370 غی منسوخی تیں بعد مقامی لوکاں نے کافی مشکل وقت دیکھیو ہے اور اس وقت نوی سرکار اس مسئلہ ور ضرور سوچ وچار کرے گی۔ موصوفہ نے کہیو کہ وے جموں کشمیر غی عوام ناہہ اک لمبا عرصہ بعد مستحکم حکومت بنن ور مبارکباد پیش کریں۔ عوام نے بڑی امید واں غے نال اپنو منشور پیش کیو ہے اور یامہ امید وی ظاہر کی ہے کہ مرکزی سرکار 5 اگست 2019 غا غلط فیصلہ غی مزمت ایوان مانہہ کی جائے۔

PCC Statehood

جموں کشمیر پردیش کانگریس غا سربراہ طارق حمید قراہ نے کہیو ہے کہ کانگریس جماعت اس ویلے نوی بنائی گئی جموں کشمیر سرکار مانہہ کسے وی وزارت مانہہ شامل نہیں ہو رہی ہے کیونجے وزیر اعظم غی طرفوں ریاست غا درجہ غی بحالی بارے کیا گیا بار بار وعداں غے باوجود اس ناہہ بحال نہیں کیو گیو۔ اپنا اک بیان مانہہ مذکورہ جماعت غا ریاستی سربراہ نے کہیو کہ کانگریس نے مرکز ناہہ جموں کشمیر غا ریاستی درجہ غی بحالی بارے پُر زور مطالبو کیو ہے۔ اُن نے کہیو کہ وزیر اعظم نے بار بار عوامی مجلساں مانہہ اس بارے وعدو کیو پر جموں کشمیر غو ریا ستی درجو بحال نہیں ہووے۔ اُن نے کہیو کہ ہم ناخوش ہاں اس واسطے ہم اس ویلے وزارت مانہہ شامل نہیں ہو رہیا ہیں۔ اُن نے کہیو کہ کانگریس جماعت جموں کشمیر غا ریا ستی درجہ غی بحالی کا سلسلہ مانہہ اپنا جتن جاری رکھے گی۔

BJP Govt

جموں کشمیر بی جے پی غا صدر رویندر رینا نے اج عمر عبداللہ نانہہ جموں کشمیر غا وزیر اعلیٰ غا طور ور حلف چان ور مبارکباد دتی تے نال ہی امید ظاہر کی ہے کہ نوی بنی سرکار مرکز غے زیر انتظام علاقہ مانہہ امن تے ترقی نانہہ بور مضبوط کرن بارے کم کرے گی۔ عمر عبداللہ نے جموں کشمیر مرکزی زیر انتظام علاقہ گا پہلا وزیر اعلیٰ گا طور ور حلف چایو ہے۔ واضح رہے جے جموں کشمیر مانہہ دفعہ 370 غی سال 2019 مانہہ منسوخی تیں بعد یاه پہلی چنی گئی سرکار بنی ہے۔ بی جے پی غا ریاستی صدر نے نامہ نگاراں سنگ گل کرتاں وان کہیو کہ ہوں دوجا وزیراں غے نال سریندر چودھری نانہہ بطور نائب وزیر اعلیٰ گا طور ور حلف لین ور وی مبارکباد پیش کروں۔ اُن نے یقین ظاہر کرتاں وان کہیو کہ نوی چنی گئی سرکار نواں جموں کشمیر غی تعمیر مانہہ وزیر اعظم نریندر مودی غا قدامان نانہہ جاری رکھے گی۔ اُن نے کہیو جے میناں یقین ہے کہ وے لوکاں غی بہتری واسطے کم کریں گا۔ اُن نے کہیو جے نوی چنی گئی سرکار پچھلا 10 بہراں مانہہ مودی سرکار غی طرفوں کیا گیا کماں غے نال نال امن تے سکون نانہہ بور مضبوط کرے گی۔

یہ خبر تم آکاشوانی جموں تیں سن رہیا ہیں خبراں غا باقی حصہ نال عید الرحمن۔

SCO Jaishanker

بھارت غا خارجہ امور وزیر ڈاکٹر ایس جے شنکر نے کہیو ہے کہ امن تے استقامت ہی کسے وی خطہ غے اندر ترقی گا ضامن وین۔ سرحدان ور آپسی انتشار، دہشت گردی، انتہا پسندی آپسی تجارت تے بھائی چارہ نانہہ بڑی طرح متاثر کرے۔ جناب شنکر شہنگائی تعاون تنظیم غی 23 وین میٹنگ غے دوران اج پاکستان غی راجدھانی اسلام آباد مانہہ خطاب کر رہیا تھا۔ وزیر موصوف نے ملک غے اندر قرضان ور تشویش غو اظہار کیو اور کہیو کہ ممالک غے درمیان آپسی تعاون نال ہی کئی معاملات حل ہو سکیں۔ ماحولیات گا تحفظ تے موسمی تبدیلیاں ور تبادلہ خیال کرتاں وان وزیر موصوف نے کہیو کہ ملکاں گا آپسی تے سانجھا مفاد خاطر اس طرز غا اقدام کرنا چاہیے۔ جس نال ماحول تے آب و ہوا نانہہ آلودگی تیں پاک رکھیو جا سکے۔ بھارت غا شمسی توانائی متعلق اتحاد مانہہ شمولیت غو ذکر کرتاں وان اُن نے بھارت غا مشن لائیو، یوگا تے اناج غا سیکٹر مانہہ کی گئی کا کردگی ور روشنی پائی۔ انہاں نے کہیو کہ اقوام متحدہ غی کارکردگی اس ضمن مانہہ کا فی موثر ثابت ہو سکے۔

Prez Visit

ترے افریقی مُلکاں غا دورہ غا دوجا مرحلہ مانہہ صدر جمہوریہ درویدی مُرمو الجیریہ تیں موریتینیا واسطے روانہ ہو گئی ہیں۔ صدر جمہوریہ نانہہ بڑا سوہنا طریقہ نال ٹوریو گیو ہے۔ انہاں نے عوامی جمہوری جمہوریہ الجیریہ غا وزیر اعظم نادر لارباوی تے دوجا اعلیٰ عہدیداراں نے رخصت کیو۔ موریتینیا غا اپنا اک روزہ دورہ غے دوران صدر جمہوریہ درویدی مُرمو موریتینیا غی قیادت غے نال دو طرفہ ملاقات کریں گی۔ تے نال ہی ہندوستانی تارکین وطن سنگ گل بات کریں گی۔ صدر جمہوریہ درویدی مُرمو اپنا ہم منصب محمد اولد غزوانی غے نال وی دو طرفہ سفارتی سطح غی ملاقات کریں گی۔ اس تیں علاوہ وے اک سماجی تقریب مانہہ وی حصول گت وے بھارتی تارکین وطن سنگ وی گل بات کریں گی۔ اس تیں بعد شام ویلے صدر جمہوریہ اپنا 3 ملکی دورہ غا آخری مرحلہ واسطے ملاوی روانہ وین گی۔

CM DG

جموں کشمیر یوٹی غا وزیر اعلیٰ عمر عبداللہ نے ٹویٹ کیو ہے کہ میں جموں کشمیر پولیس غا ڈائریکٹر جنرل نال گل کی ہے کہ سڑک ور میری آمدورفت غے دوران گڈیاں نانہ روکن غی کوشش نہ کی جائے اور عوامی مشکلات نانہ کہٹ کیو جائے۔ سڑک ور سائرن غو بہت کہٹ استعمال کیو جائے۔ انہاں نے مزید کہیو کہ لوکاں در پولیس غی طرفوں ڈنڈا نہ چکیا جائیں اور غصہ ور قابو پایو جائے۔ اُن نے کابینہ غا اپنا ساتھیان نانہ وی پاہ بدائیت جا ری کی اور کہیو کہ ہر معاملہ مانہ عوام نال مہارو برتاؤ دوستانہ ہونو چاہیے۔ اُن نے مزید کہیو کہ ہم عوام غی خدمت واسطے ہاں اور لوکاں نانہ مشکل تیں کڈنو مہارو فرض ہے۔

PM NSG

وزیر اعظم نریندر مودی نے قومی سلامتی غا یوم تاسیس ور مبارکباد پیش کی ہے۔ اپنا اک پیغام مانہ جناب مودی نے کہیو کہ این ایس جی افراد غی ہمت، حوصلہ تے بہا دری واسطے پوری قوم اُن نانہ سلامتی پیش کرے۔ جناب مودی نے قوم تے مُلک غے تئیں اِن حفاظتی دستاں غی قربانیاں نانہ یاد کرتاں واں خراج عقیدت پیش کیو۔

Shah NSG

مرکزی وزیر داخلہ امت شاہ نے قومی حفاظتی دستاں غا یوم تاسیس ور مبارکباد پیش کی ہے۔ سوشل میڈیا پوسٹ مانہ جناب شاہ نے کہیو کہ مذکورہ دستہ ”سروترہ سرووتم سُرکشا“ غے تحت زندگی گزار رہیا ہیں انہاں نے کہیو کہ یہ قومی حفاظتی دستہ مُلک غی سلامتی تے حفاظت خاطر کئی کامیابی حاصل کر چکا ہیں۔ وزیر موصوف نے این ایس جی رُمرہ گا شہید جوانان نانہ وی خراج عقیدت پیش کیو۔

LG NSG

جموں کشمیر غا لیفٹنٹ گورنر منوج سنہا نے وی قومی حفاظتی دستاں غا یوم تاسیس ور مبارکباد پیش کی۔ اور اُن غا کُنباں غی وی حوصلہ افزائی کی۔ اپنا اک پیغام مانہ لیفٹنٹ گورنر نے کہیو کہ این ایس جی غا یہ دستاں جہیڑا جے بلیک کیٹز گا ناں نال جا نیا جائیں۔ مُلک تے قوم غی سلامتی خاطر اپنی جاتاں غی قربانی وی پیش کریں۔ مُلک خاطر اُن غا اس حوصلہ نے ہمیشہ ور پوری قوم اُن نانہ سلامتی پیش کرے۔ واضع رہ کہ مُلک غے اندر دہشت گردی غا کاتمہ تے اعلیٰ سطحی خطراں نال نمژن خاطر یہ این ایس جی دستہ بنایا گیا تھا۔ اور قومی سلامتی واسطے اِن دستاں غی قربانیاں نانہ ہمیشہ یاد رکھیو جائے گو۔

اس غے نال ہی خبراں غو یوہ بلیٹن ختم ہوؤ۔